

BASES REGULADORAS (DEPOVAN) PARA A CONCESIÓN DE SUBVENCIONS A CLUBS DEPORTIVOS DA PROVINCIA DE PONTEVEDRA PARA A ADQUISICIÓN OU ADAPTACIÓN DE MEDIOS DE TRANSPORTE E MOBILIDADE DIRECTAMENTE VINCULADOS AO DESENVOLVEMENTO DA SÚA ACTIVIDADE DEPORTIVA HABITUAL NO ANO 2026

O deporte constitúe unha actividade de interese xeral, recoñecida como ferramenta fundamental para o benestar físico e emocional, a inclusión social, a promoción de hábitos saudables e a transmisión de valores coma o esforzo, o respecto e a cooperación. Neste contexto, as entidades deportivas e as e os deportistas atópanse frecuentemente coa necesidade de dispoñer de medios de transporte que lles permitan desenvolver a súa actividade, tanto en termos de accesibilidade coma de seguridade.

Así, a realidade da práctica deportiva, especialmente no ámbito competitivo, implica intrinsecamente a necesidade de contar con recursos adecuados para garantir a mobilidade eficiente e segura das e dos deportistas aos lugares de adestramento e competición. Facilitar esta mobilidade contribúe directamente a mellorar as condicións nas que se desenvolven as distintas modalidades deportivas e ao óptimo rendemento das e dos atletas.

Deste xeito, a Deputación de Pontevedra, a través do seu Servizo de Deportes, continúa a súa aposta e compromiso co fomento e desenvolvemento do deporte na provincia, prestándolles apoio fundamental aos clubs e deportistas, e dálle continuidade a unha liña de subvención destinada a sufragar os custos derivados da adquisición ou adaptación de vehículos e medios de transporte especificamente vinculados á actividade deportiva. Esta medida responde non só ao compromiso institucional co desenvolvemento deportivo, senón tamén á necesidade de garantir a igualdade de oportunidades no acceso e práctica deportiva, especialmente para aquelas persoas ou entidades que, polas súas circunstancias, requiren adaptacións específicas.

Neste contexto, o obxectivo primordial destas bases é establecer un réxime de axudas destinado a facilitar os desprazamentos necesarios para participar en adestramentos, competicións e outras actividades propias do ámbito deportivo das entidades beneficiarias. Con esta iniciativa, a Deputación busca mellorar as condicións de mobilidade e promover unha práctica deportiva segura, estruturada e accesible para todas e todos os deportistas da provincia, con especial atención ás necesidades específicas das persoas con discapacidade.

Desde o punto de vista competencial, de acordo co establecido na Lei 3/2021, de 2 de abril, do deporte de Galicia, as deputacións teñen a competencia de fomentar e difundir o deporte nos seus territorios. Ademais, na Lei 39/2022, de 30 de decembro, do deporte, recoñécese este e a actividade física como prácticas esenciais para toda a cidadanía, e destácase o papel clave das entidades locais na súa promoción.

No artigo 36.1.d da Lei 7/1985, de 2 de abril, reguladora das bases do réxime local, establécese como competencia propia das deputacións provinciais a cooperación no fomento do desenvolvemento económico e social e na planificación no territorio provincial.

Do mesmo xeito, no artigo 109.1.d da Lei 5/1997, de 22 de xullo, de Administración local de Galicia, determínanse como competencias propias das deputacións o fomento e a administración dos intereses peculiares da provincia, e, no artigo 118.d, a organización de concursos e exposicións e de calquera outra actividade cuxa finalidade sexa o fomento da cultura, da educación e do deporte.

Estas subvencións encádranse no marco normativo vixente en materia de axudas públicas e seguen os principios de publicidade, transparencia, concorrencia, obxectividade, igualdade e non discriminación, así como a eficiencia no uso dos recursos públicos. Nestas bases reguladoras defínense os requisitos, os gastos subvencionables, os procedementos de solicitude e resolución e os criterios de valoración para asegurar unha distribución xusta e rigorosa dos fondos dispoñibles.

Segundo o exposto, a Deputación de Pontevedra pon en marcha esta convocatoria para facilitar os desprazamentos necesarios para participar en adestramentos, competicións e outras actividades propias do ámbito deportivo das entidades beneficiarias, ao abeiro do establecido na Lei 38/2003, de 17 de novembro, xeral de subvencións (LXS), na Lei 39/2015, de 1 de outubro, do procedemento administrativo común das administracións públicas (LPACAP), na Ordenanza reguladora de subvencións da Deputación de Pontevedra e na demais normativa aplicable, baixo os termos e condicións que se detallan nas seguintes

BASES

Primeira. Obxecto

Estas bases teñen por obxecto regular o procedemento para a concesión de axudas aos clubs deportivos da provincia de Pontevedra para a adquisición ou adaptación de medios de transporte e mobilidade directamente vinculados aos desprazamentos para poder realizar a súa actividade deportiva habitual.

Estas axudas están dirixidas á adquisición de vehículos, remolques ou aparellos específicos para deportistas con discapacidade, ou á adaptación de vehículos, co fin de facilitar os seus desprazamentos a adestramentos, competicións e outras actividades propias do seu ámbito de actuación.

Segunda. Entidades beneficiarias

Poderán ser beneficiarias as asociacións e clubs deportivos sen ánimo de lucro, legalmente constituídos, inscritos no Rexistro de Entidades Deportivas de Galicia e con domicilio fiscal na provincia de Pontevedra.

Cada entidade poderá presentar:

- a) Entidades non beneficiarias na convocatoria de 2025: ata dúas solicitudes relativas á adquisición ou adaptación de medios de transporte directamente vinculados ao desenvolvemento da súa actividade deportiva habitual.
- b) Entidades beneficiarias na convocatoria de 2025: unha única solicitude relativa á adquisición ou adaptación dun medio de transporte.

Non poderán obter a condición de beneficiarias as entidades nas que conorra algunha das circunstancias previstas no artigo 13 da LXS, así como nas disposicións concordantes da normativa autonómica de aplicación.

Terceira. Réxime de concorrencia e valoración

A convocatoria tramitarase en réxime de concorrencia competitiva.

Para os efectos da asignación do crédito, establécense dous réximes internos de prelación:

- Réxime xeral: integrado polas solicitudes correspondentes á primeira adquisición ou adaptación de medio de transporte presentada por entidades non beneficiarias na convocatoria de 2025.
- Réxime especial: integrado polas solicitudes presentadas por entidades beneficiarias na convocatoria de 2025 e polas solicitudes correspondentes á segunda adquisición ou adaptación presentada por entidades non beneficiarias na citada convocatoria.

As solicitudes valoraranse conforme os criterios establecidos na base décimo quinta.

A proposta de concesión das solicitudes incluídas no réxime especial efectuarase unicamente no suposto de que, unha vez resoltas as solicitudes do réxime xeral por orde de puntuación, exista crédito dispoñible suficiente.

Dentro de cada réxime, as solicitudes ordenaranse segundo a puntuación obtida.

Cuarta. Ámbitos de actuación

As axudas distribuiranse en tres ámbitos de actuación diferenciados:

- **Deporte xeral:** dirixido a clubs deportivos que practiquen calquera modalidade deportiva federada, agás aquelas incluídas nas liñas de deporte náutico ou deporte para persoas discapacitadas.
- **Deporte náutico:** dirixido a clubs deportivos que practiquen modalidades ou especialidades deportivas náuticas. O deporte náutico comprende todas aquelas disciplinas que se desenvolven no medio acuático, tanto en augas interiores coma no mar, utilizando embarcacións, equipamentos específicos ou directamente o corpo humano como medio de interacción coa auga. Inclúense, con carácter enunciativo e non restritivo, entre outras, as actividades de vela, piragüismo, remo, surf, *windsurf*, *kitesurf*, esquí náutico ou pádel surf.
- **Deporte para persoas con discapacidade:** dirixido a clubs deportivos que acrediten unha traxectoria mínima de dous anos na promoción ou práctica do deporte por parte

de persoas con discapacidade. Esta acreditación deberá realizarse a través dalgunha das seguintes vías:

- Coa participación continuada, durante polo menos os dous últimos anos, en competicións ou actividades organizadas por federacións deportivas que contén con modalidades ou disciplinas específicas para persoas con discapacidade.
- Coa participación continuada, durante polo menos os dous últimos anos, en competicións ou actividades promovidas por federacións específicas de deporte adaptado, como a Federación Galega de Deporte Adaptado ou as distintas federacións españolas de deporte para persoas con discapacidade.
- Coa promoción e o fomento das persoas con algunha discapacidade, durante polo menos os dous últimos anos. Neste apartado, a Deputación valorará proxectos que demostren un labor significativo na inclusión de persoas con discapacidade no deporte.

A acreditación e avaliación deste ámbito realizarase mediante o anexo I.b. En caso de non desenvolver a súa actividade no ámbito federativo, a entidade deberá achegar unha memoria explicativa na que describa o proxecto para o que solicita a axuda, detalle as actividades previstas e xustifique a necesidade do vehículo, remolque ou actuación obxecto da subvención.

Quinta. Financiamento

A concesión das subvencións reguladas nestas bases estará condicionada á dispoñibilidade orzamentaria e convocaranse con cargo á aplicación 26/340.3410.789.05 do Orzamento da Deputación correspondente ao ano 2026, por un importe total dun millón de euros (1.000.000 €).

Co obxectivo de atender as necesidades específicas dos distintos ámbitos do tecido deportivo provincial, establécese unha distribución diferenciada do crédito dispoñible entre os ámbitos de actuación, asignándosele a cada unha delas un importe máximo:

Deporte xeral.....	550.000 €
Deporte náutico.....	350.000 €
Deporte para persoas con discapacidade.....	100.000 €

Esta cantidade poderase incrementar ata un máximo de cincocentos mil euros (500.000 €), segundo as circunstancias previstas no artigo 58.2 do Regulamento da LXS, aprobado polo Real decreto 887/2006, de 21 de xullo, e no artigo 31 da Lei 9/2007, de 13 de xuño, de subvencións de Galicia (LSG).

O importe deste aumento dependerá dunha xeración, ampliación ou incorporación de crédito. A efectividade da contía adicional queda condicionada á declaración de dispoñibilidade do crédito como consecuencia das circunstancias antes sinaladas e, no seu caso, logo da aprobación da modificación orzamentaria que proceda, antes da resolución da concesión da subvención.

Este incremento deberase publicar, antes da resolución de concesión, nos mesmos medios que a convocatoria, e indicaranse o crédito final dispoñible e a distribución definitiva. Este anuncio non implicará a apertura de prazo para presentar novas solicitudes nin o inicio de novo cómputo de prazo para resolver.

Sexta. Liñas de actuación e contías máximas subvencionables

As subvencións reguladas nestas bases estrutúranse en función de cinco liñas de actuación diferenciadas, segundo o tipo de investimento realizado, e establécese para cada unha delas un importe máximo subvencionable.

As liñas de actuación subvencionables e os seus importes máximos por solicitude son os seguintes:

Liñas de actuación	Ámbitos de actuación	Importe máximo de subvención
1. Adquisición de vehículos novos ou de km cero	Todos os ámbitos	25.000 €
2. Adquisición de vehículos de segunda man	Todos os ámbitos	15.000 €
3. Adquisición de remolques	Todos os ámbitos	5.000 €
4. Traballos de adaptación de vehículos	Só para o deporte para persoas con discapacidade	5.000 €
5. Adquisición de aparellos específicos para facilitar o traslado de deportistas con discapacidade	Só para o deporte para persoas con discapacidade	5.000 €

O importe total solicitado non poderá superar en ningún caso os límites establecidos por liña ou o 80 % do orzamento da actuación subvencionada.

Sétima. Gastos subvencionables

Terán a consideración de gastos subvencionables aqueles que, de maneira indubidable, respondan á natureza do investimento subvencionado e resulten estritamente necesarios para a adquisición ou adaptación de medios de transporte e mobilidade vinculados á actividade deportiva habitual da entidade beneficiaria, conforme as liñas de actuación previstas nesta convocatoria, realizados entre o 1 de xaneiro e o 31 de decembro de 2026.

No caso de adquisición de vehículos novos, estarán incluídos os gastos de matriculación. Os vehículos de segunda man só serán subvencionables cando sexan adquiridos a concesionarios, talleres oficiais ou establecementos similares e teñan a primeira matriculación con data posterior ao 1 de xaneiro de 2022. O resto dos gastos subvencionables deberá corresponder a bens ou servizos novos e sen uso previo.

Oitava. Lugar de presentación de solicitudes

As solicitudes presentaranse obrigatoriamente por vía electrónica a través do formulario normalizado dispoñible na Sede electrónica da Deputación de Pontevedra, <https://sede.depo.gal>, de acordo co establecido no artigo 14.2 da LPACAP.

As entidades non beneficiarias na convocatoria de 2025 poderán presentar ata dúas solicitudes relativas á adquisición ou adaptación de medios de transporte directamente vinculados ao desenvolvemento da súa actividade deportiva habitual, mentres que as entidades beneficiarias en 2025 só poderán presentar unha solicitude relativa á adquisición ou adaptación dun medio de transporte.

Para a presentación das solicitudes a Sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

En caso de representación, se non se utiliza un certificado electrónico cualificado de persoa representante deberase presentar a acreditación da representación da entidade solicitante.

Novena. Prazo de presentación de solicitudes

O prazo de presentación de solicitudes será de vinte (20) días hábiles, contados a partir do día seguinte ao da publicación da convocatoria e do seu extracto no *Boletín Oficial da Provincia de Pontevedra* (BOPPO) e na Base de Datos Nacional de Subvencións (BDNS).

Décima. Comprobación de datos

Para tramitar este procedemento consultarase automaticamente os datos incluídos nos documentos elaborados polas administracións públicas que se detallan a continuación:

- NIF das persoas xurídicas solicitantes.
- DNI ou NIE da persoa representante legal do club ou da entidade.
- Domicilio fiscal da entidade solicitante.
- Consulta de datos de vehículos.
- Consulta da listaxe de vehículos dun titular.
- Certificado de estar ao corrente das obrigas tributarias coa Axencia Estatal de Administración Tributaria (AEAT), coa Axencia Tributaria de Galicia (ATRIGA), coa Seguridade Social e coa Deputación de Pontevedra.

En caso de que as persoas interesadas se opuxesen ás devanditas consultas, deberán marcar o cadro habilitado no formulario de inicio e achegar os documentos correspondentes.

No suposto de imposibilidade material de obter o documento, o órgano competente poderá requirirle á persoa interesada a súa presentación ou, no seu defecto, a acreditación por outros medios dos requisitos aos que se refire o documento antes de formular a proposta de resolución.

Décimo primeira. Documentación

As entidades solicitantes presentarán, xunto coa solicitude, a seguinte documentación:

- a) Anexo I. Certificado federativo:
 - **Deporte xeral e ámbito náutico (anexo I.A):** certificado federativo de licenzas e desprazamentos, emitido pola federación correspondente, na que consten as licenzas totais do ano 2025 e os desprazamentos realizados pola entidade desde o 1 de xaneiro de 2024 ata a data límite de presentación de solicitudes.

- **Deporte para persoas con discapacidade (anexo I.B):** certificación federativa de licenzas e desprazamentos para o ámbito de deporte para persoas con discapacidade, emitida pola federación correspondente, na que consten as licenzas totais do ano 2025, os desprazamentos realizados pola entidade dende o 1 de xaneiro de 2024 ata a data límite de presentación de solicitudes e a xustificación na que se acredite que o club conta cunha traxectoria mínima de dous anos na promoción ou práctica do deporte por parte de persoas con discapacidade.

En caso de non levar a cabo a súa actividade no ámbito federativo, a entidade entregará unha memoria explicativa na que describirá o proxecto para o que solicita a axuda e detallará as actividades previstas e xustificará a necesidade do vehículo, remolque ou actuación obxecto da subvención.

b) Orzamento do investimento.

A entidade solicitante deberá achegar, xunto coa solicitude, un orzamento ou factura pro forma do investimento para o que solicita a subvención.

Cando o importe do investimento supere os quince mil euros (15.000 €), sen IVE, deberanse achegar tres orzamentos ou ofertas de distintos provedores e indicar a oferta seleccionada; en caso de que a elección non recaia na proposta economicamente máis vantaxosa, deberase presentar unha xustificación motivada, conforme o artigo 31.3 da LXS.

A documentación económica presentada nesta fase terá carácter inicial e poderá ser actualizada no trámite da proposta de resolución provisional, para os efectos da determinación do importe definitivo da subvención. En caso de non ser posible obter tres ofertas, a entidade deberá xustificalo.

A documentación complementaria deberase presentar electronicamente. As persoas interesadas responsabilizaranse da veracidade dos documentos que acheguen. Excepcionalmente, a Administración poderá requirir a exhibición do documento orixinal para cotexalo coa copia electrónica presentada.

Os modelos oficiais dos anexos I.A e I.B estarán dispoñibles para a súa descarga na devandita sede electrónica e deberanse empregar obrigatoriamente para presentar as solicitudes. Non se admitirán modelos alternativos.

Se algunha das persoas interesadas achegase a documentación complementaria presencialmente, requirirase que a emende a través da súa presentación electrónica. Para este efecto, considerarase como data de presentación aquela na que se realizase a emenda.

Décimo segunda. Notificacións

As notificacións de resolucións e actos administrativos realizaranse só por medios electrónicos, nos termos previstos na normativa reguladora do procedemento administrativo común.

As notificacións practicaranse a través da Dirección Electrónica Habilitada única, accesible desde <https://sede.depo.gal> ou en <https://dehu.redsara.es/>. Estas entenderanse practicadas no momento no que se acceda ao seu contido e rexeitadas cando transcorran dez (10) días naturais desde a posta á disposición da notificación sen que se acceda a este.

O sistema remitiralles ás persoas interesadas avisos da posta á disposición das notificacións á conta de correo electrónico indicada na solicitude. Estes avisos non terán en ningún caso efectos de notificación practicada e a súa falta non impedirá que a notificación sexa considerada plenamente válida.

Se o envío da notificación electrónica non fose posible por problemas técnicos, a Deputación de Pontevedra realizará a notificación polos medios previstos na normativa reguladora do procedemento administrativo común.

Décimo terceira. Trámites administrativos posteriores á presentación de solicitudes e emenda destas

Se a solicitude non reunise os datos esixidos na convocatoria ou calquera dos previstos no artigo 66 da LPACAP, requiriráselle á persoa interesada, de conformidade co establecido no artigo 68 desta lei, que, nun prazo de dez (10) días hábiles, emende as faltas ou presente os documentos preceptivos, e indicaráselle que, se non o fai, se entenderá que desiste da súa solicitude, que se arquivará sen máis trámites.

Todos os trámites administrativos que as persoas interesadas deban realizar durante a tramitación deste procedemento faranse por medios electrónicos a través do modelo "2887054 Trámites administrativos xenéricos distintos da solicitude", dispoñible en <https://sede.depo.gal>.

A Sede electrónica ten dispoñibles unha serie de modelos xenéricos que as persoas interesadas poden utilizar para realizar as xestións máis habituais durante a tramitación administrativa (representación, emenda da solicitude, alegacións, renuncia ou recursos, entre outros). Estes modelos son comúns para os distintos procedementos e poderán empregarse sempre que a normativa reguladora do procedemento concreto para o que se vaian utilizar non estableza outros modelos específicos. Os modelos xenéricos poderán descargarse para anexalos a unha solicitude ou para realizar trámites sobre outros expedientes e presentalos de forma electrónica ou presencial, segundo a normativa reguladora do procedemento do que se trate. No formulario deberá indicarse, no seu caso, o procedemento para o que se está a efectuar o trámite. Estes modelos están dispoñibles en:

<https://sede.depo.gal/web/public/dynamic/catalogo/tramitesxenericos>

Décimo cuarta. Procedemento de concesión

A concesión das subvencións realizarase en réxime de concorrencia competitiva. Para iso, as solicitudes presentadas serán comparadas entre si, co obxectivo de establecer unha orde de prelación baseada nos criterios de valoración previamente definidos nas bases reguladoras e na convocatoria. As subvencións concederánselles, dentro do límite orzamentario fixado na convocatoria, ás solicitudes que acaden unha maior puntuación tras a aplicación dos criterios de valoración.

O procedemento de selección das entidades beneficiarias e de determinación do importe da subvención desenvolverase en dúas fases: réxime xeral e, se é o caso, réxime especial.

Formarán parte do réxime xeral as solicitudes correspondentes á primeira actuación das entidades que non fosen beneficiarias na convocatoria de 2025. Pola súa parte, entrarán no réxime especial as solicitudes presentadas por entidades que resultasen beneficiarias na de 2025 e as solicitudes correspondentes á segunda actuación das entidades non beneficiarias

nesa mesma convocatoria. A valoración e resolución do réxime especial só se realizará en caso de que, unha vez finalizado o procedemento do réxime xeral, exista crédito dispoñible.

▪ **Procedemento de concesión do réxime xeral**

No réxime xeral, as solicitudes tramitaranse e resolveranse de maneira diferenciada por cada un dos ámbitos de actuación establecidos na convocatoria: deporte xeral, deporte náutico e deporte para persoas con discapacidade, e en cada ámbito aplicarase o crédito que teña asignado.

- 1) Valoración e prelación por ámbito: as solicitudes do réxime xeral serán avaliadas e puntuadas conforme os criterios de valoración e ordenaranse por puntuación dentro de cada ámbito, de maior a menor.
- 2) Determinación da subvención inicial: para cada solicitude, segundo a orde de prelación do seu ámbito, determinarase unha subvención que non poderá superar o 80 % do orzamento total presentado nin o máximo establecido para cada liña de actuación na convocatoria. Aplicarase o límite inferior destas dúas cantidades.
- 3) Axuste ao orzamento total por ámbito: sumaranse os importes das subvencións determinadas no paso anterior ata acadar o límite orzamentario total asignado a cada ámbito de actuación.
- 4) Posible rateo por ámbito: en caso de que o orzamento dispoñible permita incluír unha solicitude adicional na orde de prelación do ámbito, poderase conceder unha axuda, aínda que sexa necesario realizar un rateo entre as solicitudes incluídas nese ámbito. En ningún caso o importe da subvención resultante disto poderá ser inferior ao 90 % do importe que lle correspondería inicialmente á entidade segundo o paso 2.
- 5) Reasignación de fondos non utilizados (entre ámbitos do réxime xeral): se unha vez finalizado o proceso de concesión nun ámbito de actuación do citado réxime quedase orzamento dispoñible sen asignar e non fose posible realizar un rateo que o esgotase, a cantidade restante poderá destinarse a complementar o orzamento dispoñible nalgún dos outros ámbitos de actuación definidos na convocatoria, respectando a orde de prelación e os límites establecidos nesta e nas súas bases.

▪ Procedemento de concesión do réxime especial

Finalizada integramente a fase anterior (incluído, se procede, a reasignación de fondos entre ámbitos), e só no caso de existir crédito dispoñible, activarase o réxime especial das entidades beneficiarias na convocatoria de 2025 e das solicitudes correspondentes á segunda actuación das entidades non beneficiarias nesa mesma convocatoria, seguindo o proceso que se indica a continuación:

- 6) Valoración e prelación en lista única: as solicitudes do réxime especial serán avaliadas e puntuadas conforme os criterios de valoración e ordenaranse nunha lista única, por maior puntuación, para a súa eventual proposta de concesión con cargo ao crédito remanente.
- 7) Determinación e axuste da subvención: aplicaráselles ás solicitudes do réxime especial o mesmo réxime de determinación da subvención previsto nos puntos 2 e 4, ata o esgotamento do crédito dispoñible.

Décimo quinta. Criterios de valoración

Co obxecto de garantir unha valoración obxectiva das solicitudes, estableceranse os seguintes criterios para cada unha das liñas de actuación:

Deporte xeral e náutico

- 1) Licenzas federativas totais da entidade deportiva no ano 2025 (ata 40 puntos).

➤ Máis de 200 licenzas	40 puntos
➤ Máis de 150 licenzas	30 puntos
➤ Máis de 100 licenzas	20 puntos
➤ Máis de 50 licenzas	15 puntos
➤ Máis de 25 licenzas	10 puntos
➤ 25 licenzas ou menos	5 puntos

- 2) Nivel de participación en competicións oficiais e necesidade de transporte (ata 40 puntos).

Mediante este criterio valorarase a participación en competicións oficiais e a necesidade de desprazamento asociada. Computaranse, como máximo, dez (10) competicións oficiais realizadas entre o 1 de xaneiro de 2024 e a data límite de presentación de solicitudes. As persoas certificadas deberán constar na acta ou inscrición (deportistas ou adestradores). Nas ligas ou

competicións de máis dunha xornada, cada xornada computarase como un desprazamento independente. Non obstante, cando nunha mesma data (ou en datas consecutivas) e nun mesmo lugar a entidade participe con varias categorías nunha mesma competición oficial, computarase como unha única competición para os efectos de valoración. A puntuación outorgarase segundo esta clasificación:

➤ Por cada desprazamento con máis de 5 deportistas fóra da comunidade autónoma	4 puntos
➤ Por cada desprazamento con 5 ou menos deportistas fóra da comunidade autónoma	2 puntos
➤ Por cada desprazamento con máis de 5 deportistas fóra da provincia	1 punto
➤ Por cada desprazamento con 5 ou menos deportistas fóra da provincia	0,5 puntos

3) Número de habitantes do concello da entidade deportiva (ata 10 puntos).

➤ Concellos de menos de 5.000 habitantes	10 puntos
➤ Concellos de máis de 5.000 e menos de 20.000 habitantes	6 puntos
➤ Concellos de 20.000 habitantes ou máis	4 puntos

4) Vehículos da entidade deportiva (ata 10 puntos).

Para este criterio computaranse unicamente os vehículos de titularidade da entidade, vinculados á actividade deportiva e cunha antigüidade igual ou inferior a 5 anos, tomando como data de referencia a da publicación da convocatoria.

➤ Entidades sen vehículos computables (non dispoñen de vehículo ou todos os que teñen superan os 5 anos de antigüidade)	10 puntos
➤ Entidades cun único vehículo computable	5 puntos
➤ Entidade con 2 ou máis vehículos computables	0 puntos

Deporte para persoas con discapacidade

1) Licenzas federativas de persoas con discapacidade da entidade deportiva no ano 2025 (ata 40 puntos).

➤ Máis de 30 licenzas	40 puntos
➤ Máis de 20 licenzas	30 puntos
➤ Máis de 10 licenzas	20 puntos
➤ 10 licenzas ou menos	10 puntos

2) Nivel de participación en competicións oficiais e necesidade de transporte (ata 40 puntos).

Mediante este criterio valorarase a intensidade da participación das entidades deportivas en competicións oficiais de deporte para persoas con discapacidade e a necesidade de desprazamento asociada. Computaranse, como máximo, dez (10) competicións oficiais realizadas entre o 1 de xaneiro de 2024 e a data límite de presentación de solicitudes. As persoas certificadas deberán constar na acta ou inscrición (deportistas ou adestradoras e adestradores). Nas ligas ou competicións de máis dunha xornada, cada xornada computarase como un desprazamento independente. Non obstante, cando nunha mesma data (ou en datas consecutivas) e nun mesmo lugar a entidade participe con varias categorías nunha mesma competición oficial de deporte para persoas con discapacidade, computarase como unha única competición para os efectos de valoración. A puntuación outorgarase segundo esta clasificación:

➤ Por cada desprazamento con máis de 5 deportistas fóra da comunidade autónoma	8 puntos
➤ Por cada desprazamento con 5 ou menos deportistas fóra da comunidade autónoma	4 puntos
➤ Por cada desprazamento con máis de 5 deportistas fóra da provincia	3 puntos
➤ Por cada desprazamento con 5 ou menos deportistas fóra da provincia	2 puntos

3) Número de habitantes do concello da entidade deportiva (ata 10 puntos).

➤ Concellos de menos de 5.000 habitantes	10 puntos
➤ Concellos de máis de 5.000 e menos de 20.000 habitantes	6 puntos
➤ Concellos de 20.000 habitantes ou máis	4 puntos

4) Vehículos da entidade deportiva (ata 10 puntos).

Para este criterio computaranse unicamente os vehículos de titularidade da entidade, vinculados á actividade deportiva e cunha antigüidade igual ou inferior a 5 anos, tomando como data de referencia a da publicación da convocatoria.

➤ Entidades sen vehículos computables (non dispoñen de vehículo ou todos os que teñen superan os 5 anos de antigüidade)	10 puntos
➤ Entidades cun único vehículo computable	5 puntos
➤ Entidade con 2 ou máis vehículos computables	0 puntos

Criterios en caso de empate:

No suposto de empate na puntuación total, atenderase, en primeiro lugar, ao criterio de licenzas, considerando a súa contía numérica: nas liñas de deporte xeral e deporte náutico terá preferencia a entidade con maior número de licenzas totais, e no ámbito de deporte para persoas con discapacidade, a entidade con maior número de licenzas de deportistas con discapacidade; de persistir o empate, atenderase ao criterio de habitantes do municipio, tamén como cifra numérica, e terá preferencia a entidade do municipio con menor poboación.

Poderáselle requirir á entidade que achegue cantos datos, documentos complementarios e aclaracións resulten necesarios para tramitar e resolver o procedemento.

Décimo sexta. Instrución do procedemento

A instrución do procedemento de concesión de subvencións correspóndelle ao Servizo de Deportes.

Comprenderá as seguintes fases:

- 1) Estudo e comprobación de todas as solicitudes polo servizo instrutor, que realizará de oficio todas as actuacións que estime necesarias para a determinación, o coñecemento e a comprobación dos datos.
- 2) Informe-proposta da xefatura do servizo no que figure a valoración das solicitudes, de acordo cos criterios de concesión, se explique o sistema de valoración seguido e se relacionen as solicitudes por orde. Así mesmo, relacionaranse as solicitudes desestimadas e explicaranse as razóns da súa desestimación.
- 3) Fiscalización dos expedientes por parte da Intervención.
- 4) Unha vez examinados os expedientes e o informe-proposta, o órgano instrutor formulará unha proposta de resolución provisional debidamente motivada, que se lles notificará ás entidades interesadas mediante a súa publicación na Sede electrónica da Deputación de Pontevedra.

As entidades dispoñerán dun prazo de dez (10) días naturais, contados desde o día seguinte ao da publicación, para que poidan presentar alegacións, renunciar á subvención ou, no caso das propostas como beneficiarias, confirmar a aceptación e achegar a documentación económica necesaria para determinar o importe definitivo.

As entidades propostas como beneficiarias deberán presentar, dentro dese prazo, o seguinte:

- Escrito de aceptación da subvención (ou, se é o caso, renuncia).
- Orzamento actualizado da actuación subvencionada; cando o importe do gasto subvencionable supere os 15.000 € (sen IVE), deberán presentar tres ofertas actualizadas de diferentes provedores, con identificación da oferta elixida e xustificación expresa cando non recaia na proposta economicamente máis vantaxosa; de non ser posible obter as tres ofertas, deberase achegar unha memoria xustificativa suficiente.

A falta de presentación da aceptación ou da documentación requirida no prazo indicado impedirá elevar proposta favorable para esa entidade.

En caso de renuncia expresa, de non aceptación ou de exclusión por falta de documentación dentro do prazo, notificaráselle individualmente a concesión á seguinte entidade na orde de prelación, que dispoñerá dun prazo improrrogable de cinco (5) días hábiles desde a recepción da notificación para confirmar a aceptación e presentar, se procede, a documentación económica indicada.

- 5) Informe-proposta sobre as alegacións ou renuncias.
- 6) Proposta de resolución definitiva. Logo de examinadas as alegacións e as posibles renuncias, formularase a proposta de resolución definitiva, que deberá expresar a persoa solicitante ou a relación de solicitantes para as que se propón a concesión da subvención e a súa contía. Tamén recollerá as solicitudes rexeitadas e os motivos da súa exclusión.
As propostas de resolución provisional e definitiva non crean dereito ningún a favor da persoa beneficiaria proposta fronte á Administración mentres non se lle notifique a resolución de concesión.
- 7) Informe de fiscalización da Intervención de todos os expedientes e da proposta de resolución definitiva.

Décimo sétima. Resolución do procedemento

A proposta de resolución definitiva formulada polo órgano instrutor someterase á aprobación do órgano competente, que resolverá o procedemento.

O acto de resolución do procedemento publicarase no BOPPO e terá os efectos dunha notificación por tratarse dun procedemento de concorrencia competitiva (artigo 45 da LPACAP).

Así mesmo, serán igualmente obxecto de publicidade a través da páxina web da Deputación de Pontevedra.

O prazo máximo para resolver e notificar a resolución do procedemento non poderá exceder os seis (6) meses, contados a partir do día seguinte a aquel no que finalice o prazo de presentación das solicitudes. O vencemento do prazo máximo sen notificar a resolución lexítima as persoas interesadas para entender desestimada por silencio administrativo a solicitude de concesión da subvención.

Décimo oitava. Compatibilidade e incompatibilidade

A subvención será compatible con outras subvencións, axudas, ingresos ou recursos para a mesma finalidade procedentes de calquera Administración ou ente público ou privado, e será incompatible con calquera outra subvención para a mesma persoa beneficiaria e a mesma finalidade, con cargo a créditos desta Deputación e dos seus organismos dependentes.

Segundo o disposto no artigo 19.3 da LXS, e no 17.3 da LSG, "o importe das subvencións en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada".

Décimo novena. Procedemento de xustificación e pago

As entidades deberán xustificar que cumpren a finalidade, acadan os obxectivos, aplican os fondos e as demais obrigas impostas coa concesión da subvención.

A xustificación poderá presentarse a partir do día seguinte ao da publicación da resolución de concesión definitiva das subvencións no BOPPO. O prazo de presentación das xustificacións finalizará o 31 de marzo de 2027.

Para a xustificación, as entidades beneficiarias deberán presentar, obrigatoriamente por medios electrónicos e a través do modelo normalizado, a seguinte documentación:

- **Conta xustificativa dos gastos (anexo II):** documento no que a entidade beneficiaria deberá acreditar o custo total da finalidade subvencionada, mediante a relación detallada da factura ou facturas correspondentes ao investimento finalmente aceptado na resolución de concesión.

Neste anexo a entidade incluírá, ademais, unha declaración responsable na que conste o seguinte:

- Que o vehículo, remolque, aparello específico ou adaptación se destinará ao uso para o que se conceda a subvención durante a súa vida útil, que non poderá ser inferior a cinco anos.
 - Que manterá en todo momento os logotipos da Deputación nas condicións establecidas.
 - Que participará no acto formal de entrega ou presentación da adquisición ou da adaptación, nos termos previstos na convocatoria.
- **Factura** con valor probatorio no ámbito mercantil e administrativo, polo importe do vehículo, do remolque, da adaptación do vehículo ou da adquisición dos aparellos específicos para deportistas con discapacidade.
 - **Documento xustificativo da publicidade.** Débese presentar un documento gráfico que xustifique a publicidade e difusión da subvención.

Outras normas que se deben ter en conta na xustificación:

- Para a adquisición dos bens obxecto desta convocatoria, poderán aprobarse pagamentos anticipados de ata o 80 % da subvención concedida, de conformidade co previsto na normativa de subvencións.
- A entidade poderá solicitar unha ampliación dos prazos establecidos, sempre que non exceda da metade destes e con iso non se prexudiquen dereitos de terceiras persoas.
- En caso de que a entidade beneficiaria xustificase gastos por un importe inferior ao orzamento inicialmente presentado, pero suficientes para amparar o importe da

subvención concedida de acordo con estas bases sen prexudicar a terceiras persoas, non procederá redución ningunha. Pola contra, se a xustificación achegada non acadase o importe mínimo necesario para xustificar a totalidade da subvención concedida, aboarase unicamente a parte proporcional correspondente aos gastos debidamente xustificadas.

- Os gastos presentados na conta xustificativa deberán pagárselles ás súas respectivas proveedoras e provedores antes de entregar a xustificación da subvención. En caso de que o club non dispoña de fondos nese momento, terá un prazo máximo dun (1) mes a partir da percepción da subvención para efectuar eses pagos. Se posteriormente, mediante control financeiro, se comprobase que algún dos gastos non se pagou ou se fixo fóra de prazo, este deixará de ser subvencionable.
- As entidades beneficiarias das subvencións provinciais deben empregar, con carácter xeral, formas de pago a terceiras persoas que poidan acreditarse mediante un documento expedido por unha entidade financeira no que queden identificados a ou o beneficiario, o importe e a data de pago (tarxetas bancarias de crédito ou débito, talóns nominativos, transferencias bancarias etc.).
- En caso de clubs que non teñan contabilidade, os gastos que non se paguen mediante unha entidade financeira non se considerarán subvencionables.
- Unha vez vencido o prazo de xustificación sinalado nestas bases ou, no seu caso, o establecido na prórroga sen que a entidade beneficiaria presente a documentación xustificativa, o Servizo de Deportes requiriralle que o faga no prazo improrrogable de quince (15) días. O feito de non presentar a documentación neste prazo supoñerá a perda do dereito a cobrar a subvención e as demais responsabilidades previstas na LXS.

Con carácter xeral, o pago realizarase tras a aprobación da xustificación. Non obstante, poderán aprobarse pagamentos anticipados de ata o 80 % da subvención concedida, nos termos establecidos nestas bases.

Para cobrar a subvención, os clubs deberán estar ao corrente das súas obrigas tributarias coa AEAT, coa ATRIGA, coa Seguridade Social e coa Deputación de Pontevedra.

Vixésima. Obrigas das entidades beneficiarias

Ademais das previstas no artigo 14 da LXS, as entidades beneficiarias terán que cumprir:

- 1) As medidas de publicidade e difusión nos seguintes termos:
 - Rotulación:
 - Vehículos: a entidade beneficiaria deberá rotular o logotipo da Deputación de Pontevedra nos catro lados do vehículo adquirido ou adaptado, como mínimo do tamaño que se define no manual de imaxe corporativa; incluírase, nos dous laterais e xunto ao logo, a frase “Vehículo subvencionado pola Deputación de Pontevedra”.
 - Remolques: a entidade beneficiaria deberá rotular nos tres lados do remolque o logotipo da Deputación de Pontevedra, como mínimo do tamaño que se define no manual de imaxe corporativa, e incluírá nos dous laterais, xunto ao logo, a frase “Vehículo subvencionado pola Deputación de Pontevedra”.
 - As entidades beneficiarias das liñas de adquisición de aparellos específicos para deportistas con discapacidade ou de adaptación de vehículos deberán darlle publicidade ao financiamento da Deputación de Pontevedra na súa páxina web. De non dispoñeren dela, por un medio alternativo de difusión pública, que acreditarán na xustificación.
 - Acto formal:

A entidade beneficiaria deberá coordinar coa Deputación de Pontevedra a planificación e os detalles do acto formal de entrega da adquisición do vehículo, do remolque ou do aparello específico para deportistas con discapacidade, ou da adaptación do vehículo. Esta coordinación incluírá, entre outros aspectos, a data, o lugar, o horario e os asistentes previstos. A celebración deste acto estará supeditada á aprobación expresa e previa por parte da Deputación de Pontevedra, quen validará a proposta coordinada e outorgará o visto e prace definitivo para a súa realización.
 - Publicación:

A entidade beneficiaria deberá publicar na páxina web e nas redes sociais o acto de entrega.
- 2) A entidade deberá comprometerse a darlle ao vehículo o uso para o que foi concedido durante a vida útil deste (que non poderá ser inferior a cinco anos), e a que figure en todo momento o logotipo da Deputación.
- 3) Os demais supostos previstos nesta normativa reguladora das subvencións.

Vixésimo primeira. Reintegro ou perda do dereito ao cobro da subvención

As subvencións concedidas deberán reintegrarse cando as causas sexan posteriores ao pagamento destas.

Perderase o dereito a cobrar a subvención, total ou parcialmente, no suposto de falta de xustificación ou de concorrencia dalgunha das causas previstas na lexislación de subvencións e, en concreto, polas seguintes:

- Por incumprir as obrigas establecidas con motivo da concesión da subvención.
- Por incumprir as obrigas de xustificación.
- Por incumprir as obrigas de adoptar medidas de difusión do financiamento público recibido.
- Polas demais causas establecidas na normativa de subvencións.

Vixésimo segunda. Órgano de aprobación

De acordo co establecido na base 16.2 das de execución do Orzamento para o ano 2026 e no artigo 17 da LXS, o órgano competente para aprobar estas bases é a Xunta de Goberno.

Vixésimo terceira. Dereito supletorio

Para o non disposto nestas bases contemplárase o establecido no artigo 4 da Ordenanza xeral de subvencións da Deputación de Pontevedra.

Vixésimo cuarta. Publicidade da convocatoria

Estas bases reguladoras publicaranse no BOPPO e en <https://sede.depo.gal>.

Por outra banda, de conformidade co previsto nos artigos 17.3.b e 20.8.a da LXS, o texto da convocatoria remitiráselle á BDNS para a súa publicación nela, que será a que lle dea traslado do seu extracto ao BOPPO.

Vixésimo quinta. Protección de datos

Os datos persoais obtidos neste procedemento serán obxecto de tratamento pola Deputación de Pontevedra, en calidade de órgano responsable, coa finalidade de xestionar este

procedemento, verificar os datos e os documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento baséase no cumprimento dunha tarefa de interese público ou no exercicio de poderes públicos segundo as normas de rango legal recollidas no apartado “Normativa aplicable”, dispoñible na ficha de procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia e ao público xeral dada a publicación de actos prevista.

As persoas interesadas poderán acceder, rectificar e suprimir os seus datos, así como exercer outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.